

OBSERVATIONES
DE
OPERATIONIBUS PLASTICIS
IN NOSOCOMIO CHIRURGICO DORPATENSI AB ANNO 1841
USQUE AD ANNUM 1854 INSTITUTIS.

DISSEMINATIO IN ACADEMIA

QUAM
CONSENSU ET AUCTORITATE
GRATIOSI MEDICORUM ORDINIS
IN
UNIVERSITATE LITERARUM CÆSAREA DORPATENSI
AD GRADUM
DOCTORIS MEDICINE
RITE ADIPISCENDUM.

LOCO CONSUETO PUBLICE DEFENDET

AUCTOR

Boleslaus Szokalski.



DORPATI LIVONORUM.

TYPIS VIDUÆ J. C. SCHÜNMANNI ET C. MATTIESENI.

MDCCLXIV.

VIR

DOCTISSIMO EXCELLENTISSIMO

FAUTORI BENEVOLO

D^RI LUDOVICO FRIDERICO KAEMTZ

A CONSIL PUBLIC. MEDICINAE ET PHILOSOPHIAE D^RI

UNIVERSITATIS CAESAREAR LITERARUM DORPATEN.
SIS PROFESSORI PUBLICO ORDINARIO

HOC OPUSCULUM

SIGNUM OBSERVANTIAE DEBITAE

OFFERT

AUCTOR.

D 17140

Praefatio.

Chirurgia plastica, quae paucis abhinc decenniis tam parum adhibita fuerat, ut rhinoplastice in rebus commenticiis haberetur, operationibus atque investigationibus, a clarissimis Carpne, Graefe et Dieffenbach institutis, in chirurgia operativa civitatem adepta est. Virorum doctissimorum exemplum secuti, nostra aetate scrutatores eandem materiam pertractare coeperunt. Nihilominus tamen procul abest, ut res eum, ad quem evehi potest, perfectionis gradum sit assecuta. Disputationes enim physiologicae, ab illustrissimis Bunker et Dieffenbach de lobi transplantati ratione modoque, quo partes cutis perfecte disjunctae consanescant, susceptae, novarum pervestigationum, ex quibus certae de chirurgia plastica regulae repetantur, solum initia quaedam posuerunt. Etenim conditiones, quibus operationes plasticae jubeantur, haudquaquam ad artis praecepta sunt definitae, ut ad hunc diem faciei deformitas pro praecipua, quae eas fieri imperet, habita sit causa. Quamquam tempore priore vulgata erat opinio, qua omnibus cachexiis, dum in corpore saevient, operationes prohiberi credebantur, aetate recen-

tissima ista sententia multis in rebus est commutata. Ceterum, quenam cachexiae operationes vetent, ne nunc quidem inter omnes satis convenit. Licet observatio cli. Martinet de la Creuse, qui operatione plastica facta, *quomodo cancer mammae* in eundem, quo fuit, locum recidat, impediri statuit, non sit confirmata, tamen res ea haud dubie digna est, quae diligenter, quam adhuc factum est, cura studioque perquiratur. Verumtamen, id quod vehementer dolendum est, pauciores hac de re existant observationes, quam ex quibus certum deducatur judicium, qua de re admodum est optabile, cetera quoque nosocomia suas, quae hoc pertineant, observationes publici juris facere. Qua causa adductus, equidem operationes plasticas nostro in nosocomio quatuordecim annorum spatio factas in hac dissertatione describendas sumsi, ut, si quis ad fructus, qui ex chirurgia plastica percepti sint, contemplandos incumbere voluerit, ei plus materiae ad rem accuratius tractandam suppetat.

Hac in re facere non possum, quin praecessori summe venerando Prof. Dr. Adelmann, qui summa, qua est, comitate me quoque semper adjuverit, maximeque, quum hanc materium perquirere in animum induxissem, magnam observationum multitudinem mihi suppeditaverit, intimo animo gratias per solvam quam plurimas.

Paucis abhinc annis Dr. Alexander Messerschmidt in dissertatione, ita inscripta „de Chiloplastice pree-

serunt in labiis cancerosis“ operationes eo spectantes, usque ad annum 1850 institutas, in medinn protulit. Quum autem illo ex tempore, quo dissertatione Messerschmittiana edita est, multae aliae operationes chiloplasticae fuerint institutae, non potui, quin in meae commentationis capite proprio etiam de operationibus modo dictis dissererem, lectorem benevolum de operationibus hisce ante annum 1850 factis ad dissertationem modo commemoratam rejiciens.

Omnino nobis optimum est visnm, operationes diversas secundum organa, in quibus susceptae sint, in certas classes redigere, atque deinceps pertractare. Spatio ut parcam, neve lectorem inutilibus operationum descriptionibus defatigem, satis habeo in unaquaque operatione, si quidem nullae modificationes existent, simpliciter methodum, qua peractae sint, memorare, quippe qui mihi videar praesumere posse, quemque, cui operae pretium sit, hanc commentationem perlustrare, rationem, qua operatio fiat, ipsum satis cognitam habere.

Prolegomena.

Ad singulas operationes describendas antequam accingar, chirurgia plastica quae sit, necessarium videtur definire, quo certius limites, quibus opusculum meum circumscripsum volo, constitui possint. Plastica enim ea dicitur chirurgiae operativae pars, quae nos artem edoceat corporis partes perditas, adhibitis partibus consimilibus, restituendi¹⁾. — Quum autem materiae, quibus uti licet, ex sola cute consistant, organis tantum formam externam reddi, neque ullo modo partes illa constituentes reparari posse, per se intelligitur. Itaque ad chirurgiae plasticae rationem hoc maxime pertinet, ut materiae, quibus uti velimus, postquam loco primitivo sejunctae sunt, alio transplantentur. Eae vero operationes, in quibus substantiae jactura, cute obducta, tegatur, id quod in ratione a cl. *Chopart* descripta nomineque methodi francogallicae appellari solet, hic non videntur trahendae esse. Qua definitione posita, ceteris omnibus omissis eas tantummodo operationes describam, quae omnibus chirurgiae plasticae postulatis stricte respondeant.

1) v. Ammon's und Baumgarten's Preisschrift über plastische Chirurgie. Berlin 1842. Pag. 3.



Caput I.

De rima palpebrae dilatanda et angulo oculi artificiali formando (Canthoplastice).

Nusquam fortasse frequentius, quam nostris in regionibus, in quibus propria Estonis cavitatis oculi palpebraeque conformatio quandam quasi praedispositionem afferit²⁾, hujus maxime operationis instituendae praebetur occasio, quo fit ut largam observationum copiam, in nosocomio nostro chirurgico oblatarum, proponere licet. Quum autem in omnibus hisce operationibus methodos canthoplastices, a prof. *Adelmann* inventa³⁾, in usum vocata fuerit, quae methodus nostra in terra secundos praebuat eventus, singulos casus perscribere, ut mea fert opinio, justo est longius. Quam ob rem, methodo prof. *Adelmann* descripta, operationum secundum hanc methodum factarum numerum earumque exitus accuratius expondere conabor.

2) Prof. Dr. *Adelmann* Beiträge zur medicinischen und chirurgischen Heilkunde. Erlangen 1845, pag. 86—88. Prof. Dr. *Hueck* de crassis Esthonorum, Dorpati 1838.

3) Medicinische Zeitung Russlands. 1846, pag. 388. Canthoplastik.

Aegroti, quibus haec operatio adhibita est, omnes fere trichiasi vel distichiasi saepius cum limbi palpebrae ad partem internam inflexione laboraverunt, nec non in omnibus peculiaris Esthonorum blepharophimosis adfuit, operatione plerumque ad trichiaseos operationem praeparandam suscepta.

Operatio plerisque in casibus secundum methodum dictam simul in utroque oculo tali modo est instituta. Aegro primum ad operationem rite praeparato, sellaeque consuetae imposito, chirurgus specillum excavatum acutum (*Panaritium-sonde*) pone cantham externum palpebrarum, in plicam conjunctivae iatroducit, indeque, manus liberae digito pollice in cavitatis oculi marginem imposito, arcteque appreso, ope specilli memorati omnes partes molles inter specilli apicem digitumque pollicem interjectas transfigit, ita ut specillum pollicem dimidium e cute externa promineat. Tum, cultro Pottiano, in fistulis usitato, apprehenso ponteque, qui inter canthum externum specillumque formatus est, disseco, spongia aqua frigida impleta sanguinis profluvii sistendi causa applicatur et specillum amovetur. Finita sic prima operationis parte, jam chirurgus; sanguinis profusione sedata, ad lobum membranac mucosae formandum accingitur. Quae res plerumque hoc modo peragitur. Chirurgus ope volsellae uncatae tenuissimae plicam e conjunctiva bulbi attollit, nonnullisque a cornae margini lineis forcice tenui *Cooperiana* vel *Davilliana* incisam sensim progrediendo incisuris parvis in formam orbis dimidiati, cuius convexitas ad corneam vergat, ab bulbo sejungit, vel, si quidem lobi longitudine ad palpebras cingendas non sufficiat, amplius separat, ut lobus ponte ipsius magnitudini respondente cum bulbo cohaereat. Quo facto, lobum circa ipsius petiolum

convertit, atque in oculi angulum recens formatum inducit, ubi lobo suturis nodosis cum cete conjuncto, fomentationes praecipit. Tribus vel quatuor diebus elapsis, quum suturae amoventur, vulnus operatione illatum plerisque in casibus jam per primam intentionem sanatum cernitur. Raro accedit, ut vulnus sine ulla graviore causa pus emittere incipiat. Gangraena, quum praecipua, qua efficiatur, conditio, nempe lobi tensio, conjunctiva per telam celulosam admodum laxam ductilemenque bulbo affixa, desit, in hac operationis methodo nunquam est observata. E contrario, si hanc methodum simul in utraque palpebra adhibueris, saepe periculum est, ne, quum lobo intento strabismus externus artificialis exorierit, suturae evellicantur. Quod ut praecauteatur, neve operatio, si in utroque oculo necessaria fuerit, inutiliter in longum trahatur, prof. *Adelmann* methodum suam eo commutat, ut, in altero oculo non e conjunctiva bulbi sed e conjunctiva palpebrae inferioris lobum conformet. Etenim, a parte interiori initio facto ad externam versus lobum sejungere incipit, ita ut petiolus ejus partem exteriorem spectet, quo facto lobum conversum simili modo, atque supra descripsimus, ad cutem affigit. Quia re quum prohibeatur, ne strabismus existat, quumque lobi distortioni obviam eatur, prima intentione facilime facta, diebus quatuor vel quinque circumactis, jam entropii et trichiasis operatio suscipi potest. Quin etiam entropium, si minus evolutum est, sola operatione tollitur, et palpebrae, aliquot hebdomadibus exactis, vix ullum operationis vestigium offerunt, angulo oculi artificiali proxime ad naturalis similitudinem accidente.

Secundum hanc methodum novem annorum spatio

duodeviginti factae sunt operationes, quarum prospere semper erant eventus. Attamen permulti aegroti, in quibus haec operatio instituta erat, quum morbi secundarii, propter peculiarem Estonis oculorum formationem exorti, velut diversae oculorum obnubilations, diutius perdurassent, quam qui tolli possent, pristinam videnti facultatem non amplius recuperaverunt. Quae res tamen, quum finem operationi propositum, praesertim rimae palpebrarum dilatandae, semper assequi licuerit, methodi modo descriptae dignitatem nequaquam minuere potest.

Caput II.

De operationibus plasticis, quae in palpebris sunt factae (Blepharoplastice).

1. Symblepharon inferius. Operatio Ammoniana; blepharoplastice Dieffenbachiana.

Anna Wiegand, Letta rustica, annos viginti tres nata, habitu torpido scrophuloso praedita, temperamento ingenii phlegmatico, anno 1844 die mensis Septembris 23 in nosocomium nostrum chirurgicum fuit recepta. Aegrota, si vel obiter adspiceres, magnam prodidit photophobia, in vultu effectibus blepharospasmi diutius continuati facile apparetibus. Palpebrae, praesertim oculi dextri, paulum rubefactae, tumidaeque hic illic secreto mucoso corrodeante excoriatae cernebantur.² Palpebra inferior utriusque oculi incrassata, torosa ciliisque parcis, per exiguis obsita erat. Eadem palpebra utroque in oculo funiculis partim carnosis,

partim membranaceis adeo bulbo adhaeserat, ut tantum parva conjunctivae palpebrarum pars libera appareret, oculique movendi facultas perquam esset impedita. Adhaesiorum, quae partim recens formatae, partim conjunctiva breviore facta exortae erant, utrimque una maxime et magnitudine sua et forma excelluit. Namque in oculo dextro inde ab externo palpebrae cantho usque ad medium palpebrae inferioris partem funiculus satis crassus carnosusque, ad conjunctivam scleroticae tendens, ibidem, marginem cornea non superans, sat late extensus inseritur. In oculo sinistro conjunctio inter palpebram inferiorem bulbumque funiculo carnosissimo, transverso, nimis prominente efficitur, qui funiculus basi latissima partim conjunctivae palpebrae, partim plicae semilunatae adharens, sensim extenuatus usque ad corneam pertinet, ubi, majorem pupillae partem obtengens, apice suo insidet. Praeterea in utraque palpebra inferiore complures funiculi conjugentes, brevissimi, membranacei inveniuntur, parteque laeva simul inferius punctum lacrymale totum cernitur oblitteratum. Palpebra oculi dextri superior praeter cilia normalia alteram ciliarum irregularium, post ipsa normalia positorum, brevium setisque similium seriem offert. In palpebrae sinistrae margine cilia, ut quae una cum palpebrae margine ad partem internam bulbum versus spectent (trichiasis ex entropio), fere omnino adspectum fugiunt.

Ad bulbos oculorum quod attinet, imprimis. sinistri commutatio mirabilis appareat. Corneam torus, de quo diximus, carnosus adeo tegit, ut neque iridis, neque pupillae illum deprehendatur vestigium, dum ceteram bulbi partem membrana opaca laxaque structurae fibrosae, quae, ut vide-

tur, cum bulbo arcte coaluit, et cujus in superficie novum rete vasculosum in regione corneae sese evolvit, obducit. Totus bulbus, volumine minutus, paululum complanatus apparet speciemque offert rugosam, tardius movetur, et contractanti minorem, quam statu normali, tensionem praebet. Oculi dextri bulbus paululum irritatus est, vasaque scleroticae nimia sanguinis copia impleta in corneam transeunt, quae obscuratam se praestat duabusque maculis parvis, circumscriptis, colore subgriseo tinctis, magnitudine capita acuum aquantibus, obtinetur. Aegrota, dum oculo dexteris majores minorumque lineas extremas cernere potest, sinistro non valet nisi lucem ab umbra distinguere. Valeudo universa, exceptis doloribus, non ita acribus, subinde per caput cerviccsque tendentibus, qui, plerumque vespere exorti, aëris temperie variata, ad majorem vehementiam increscent, ceteroquin non admodum erat turbata. Symblepharon inferius ut tolleretur, methodus *Ammoniana* in usum vocata est. Ob M. Orbicularis palpebr. hypertrophiam quem fieri non posset, ut vulneris margines inter se jungerentur, blepharoplastice *Dieffenbachiana*, cum illa, quam diximus, methodo consociata, lobus suturis circumvolutis cum parte palpebrae inferioris, ad oculi canthum internum relicta, fuit conjunctus. Substantiae jactura, formam triangularem referens, ad tempora lobo translatu effecta, eo rursus resarta est, quod vulneris margines, secundum methodum *Chelianam* alter alteri appropinquati, suturis circumvolutis inter se connexi sunt. Fascia ex singulis emplastri anglicani taeniolis applicitis constituit, vulnerisque per primam intentionem sanatio fomentationibus frigidis est adiuta. Reactione traumatica in universum exigua exorta, et

oedema levius exstitit, et lobus transplantatus postea tantum breve per tempus sugillationes obtulit, quae phænomena omnia, paucis diebus transactis, cessaverunt. Tertio post operationem die ex angulis defectus cutis triangularis ad tempora facti duea suturae amoveri poterant; die quinto vulhere majore ex parte per primam intentionem sanato, quo dic iterum duas suturas solvere lieuit. Denique die sequenti duabus ultimis suturis remotis emplastrum anglicum vulneri est impositum. Fomentationibus frigidis omissis, e margine palpebrae secretum satis profusum emanare coepit, ad quod effluvium cōcēdūtū et instillationes zinci sulphurici soluti institutae et cilia spuria ex palpebra superiore procrescentes irritationis tollendae causa ablata sunt. Septimo decimo post operationem die, parte illa triangulari, quae ad bulbum relicta erat, ab eo soluta, fomentationes frigidæ præscriptæ sunt. Aliquot inde diebus exactis, quoniam distichiasis operatio secundum methodum *Jaegerianam* esset peracta, tamen octo diebus post cilia spuria rursus in conspectum venerunt, ad quae demovenda quum iterum partialis marginis tarsalis extirpatio suscepta esset, operationis eventus prosperrimus fuit. Aegrota, videndi facultate valde in melius mutata, e nosocomio est dimissa.

2. Coloboma palpebrae superioris acquisitum. Blepharoplastice *Dieffenbachiana*.

Alter quidam blepharoplastices casus brevi post priorem est observatus. Mulier erat Russica nomine Afimia Jakowlena annorum 36, in qua processu exulcerationis coloboma palpebrae superioris oculi dextri, de quo tamen

aegrota nihil certius referre potuit, exortum fuerat. Substantia destruta forma erat triangula regulari, apice obtuso sursum converso, ut diligentius contemplatus arte productam esse crederes. Quum aegrota simul distichiasi palpebrae superioris oculi ejusdem laborans operationem sustinore vellet, colobomatis operationem cum illa conjungendi consilium est initum. Itaque, femina in nosocomiam recepta, operatio die Maji mensis quinto talem in modum est instituta. Postquam substantia destruta, vertice obtuso praedita, cuius basis ad canthum oculi posita fere linearum $3\frac{1}{2}$, latera lineae $1\frac{1}{2}$ erant, marginibus ablatis, in figuram angulo acuto instructam, cuius apex infra marginem supraorbitalem situs esset, commutata est, blepharoplastice secundum methodum *Dieffenbachianam* peracta fuit. Ut autem distichiasis simul tolleretur, parallela cum palpebrae margine directione, e lobo transplantando pars cutis excisa est et tarsus directione eadem persecutus. Margines vulneris, incisura verticali illati, suturis circumvolutis, et alterius incisione horizontali effecti suturis nodosis inter se sunt conjuncti. Operationis successus quum optimus fuisset, aegrota, et distichiasi et colobomate sanatis, e nosocomio est dimissa.

3. Cancer epithelialis buccae et palpebrae inferioris. Blepharoplastice *Dieffenbachiana*.

Anno 1851 exeunte Esthonus, nomine Jurri Karlis, cancro epitheliali buccae affectus, artis auxilium in nosocomio nostro imploravit. Quamvis, malo jam satis evoluto, regionis circumjectae infiltratio sat magna cerneretur, tamen tumor adhuc moveri poterat. Aegrotus, nullum cachexiae

cancrosae vestigium offerens, glandulis nonnullis colli, quae intumuerant, exceptis, valetudine utebatur non incommoda. Cancrum remedii causticis removeri quum placuisse, eum in finem pulvis causticus est adhibitus. Qua cura tamen cancer non modo non est comminutus, verum etiam ambitu adeo accredit, ut usque ad externam palpebrae commissuram extenderetur. Quac quum ita essent, ut cachexia magis magisque sese evolvens praecaveretur, glandulis colli et ipsis conspicuum in modum auctis, nihil supererat aliud, nisi ut partes affectae, quam fieri posset, celerrime auferrentur. Dic mensis Januarii 26 blepharoplastice suscepta, partes morbidae primum figura triangulari, cuius duo crura, ab utraque palpebra initio capto, in gena alterum cum altero coniungerentur, latusque tertium margine palpebrac externo esset effectum, a partibus integris disjunctae subtalataeque fuerunt, palpehra nova secundum methodum *Dieffenbachianam* e cute temporali effecta. Sanatione brevissimo tempore facta, substantiae jactura lateralis mox granulationibus fuit reparata. Verumtamen post operationem, glandula submaxillari lateris affecti admodum augeri coepit, fluctuatio quaedam obseurior exstitit. Quam ob causam, quum glandula exstirpari placuisse, aegrotus tamen nulla conditione, ut operationem subire animum induceret, commotus, instantissime ut e nosocomio dimitteretur petivit. Loco, quo operatio instituta fuerat, fere sanato, parvoque tantum facici et conjunctivae bulbi ocdernate relicto, voto ejus satisfactum est; qua de causa die mensis Februarii 20 nosocomio excessit. Sed jam septimo mensis Martii die, quum glandula maxillari in dies crescente valde sollicitari videtur, in nosocomium reversus, tamen consilio operationis sustinendae

dato obsequi noluit. Itaque ei unguentum ex auri muriatici natronati gr. V in ung. digitalis ʒj praescriptum est, simulque, ut nosocomium saepius adiret, fuit admonitus. Die quidem mensis ejusdem 24, unguentum iterum perfuturus, revertit, postea tamen, quum non amplius redisset, quid de eo factum sit, cognitum non habemus.

Caput III.

De nasi ejusque appendiculum operatio-nibus plasticis (Rhinoplastice).

4. Lupi sequelae — Rhinoplastice *Dieffenbachiana* formatioque septi ex labii superioris cute.

Anna Punna, ancilla Esthonica, anno 1845 extremo, ut lupus, quo laborabat, curaretur, apexque nasi perditus reparetur, ad nosocomium nostrum confugit. Aegrotae primum cura fortiori tum universa tum topicia adhibita, malum debellare licuit. Reliquum erat, ut apex nasi deficiens, omnino corrugatus, restitueretur, quae operatio anno 1846 a prof. doctissimo *Carus* secundum methodum *Dieffenbachianam* est instituta. Quum ossea nasi pars perfecte esset servata, cutisque intacta mansisset, eam integrum relinquivimus est, ideoque, cute a nasi dorso non ablata, lobus e fronte desumptus super eam ductus et ad apicem nasi formandum adhibitus fuit. Qua operatione tamen lobum non eo usque ad partem anteriorem deducere licebat, ut ad nasi apicem conformandum sufficeret, quo factum est, ut nasus justo brevior existeret. Accedebat praeterea, quod pars cutis septo formando destinata nimis lata erat. Facies telae

cellulosae quo melius inter se coalescerent, septumque angustius fieret, filum bombycinum huic parti circumdatum est, cuius fili tanta erat efficacia, ut dierum quatuor spatio septum percinderetur. Jam nihil restitut aliud, nisi ut, partibus eo quo erant statu relictis, quum duae septi partes, fieri non posset, ut inter se coniungerentur, novum septum efficeretur. Aegrota septo nasi carens e nosocomio demissa jam anno sequenti, ut operatio ad finem perduceretur, orans revertit, quo facto prof. *Adelmann*, cute sine ulla lobi conversione partem internam versus vulnerisque facie ad exteriora posita, septum ex labii superioris cute effinxit⁴⁾. Septo coalito, aegrota iterum ad tempus nosocomium reliquit. Postea tamen nares adeo sunt coarctatae, ut aëris aditus omnino intercludeatur. Cui narium coarctationi quum nulla dilatandi ratione occurri posset, ut aegrotae aëris aditus paululum pateret, anno 1847 Prof. *Carus* septum dissecari necessarium visum est. Inde aegrota nosocomio excessit annoque 1848 cholera correpta die abiit supremo.

5. Defectus nasi post syphilidem. — Rhinoplastice partialis.

Lisa Holtz, ancilla Esthonica, e praedio Heimadra oriunda, annos 18 nata, anno 1849 ineunte in nosocomium est accepta. Aegrota corporis statura parva, sed constitutione robusta, cute laxa pallidaque et habitu cachectico satis expresso praedita nasum offerbat mirum in modum syphilide destructum. Septum per linearum 3 longitudinem perforatum erat nasique parte sinistra ulcus fistulosum mar-

4) vide *Zeits. plastische Chirurgie*, p. 336

ginibus crusta subviridi obtectis circumdatum, pollicem longum, ab inferiore ossis nasi granulationibus impletu marginie usque ad alae nasi marginem pertinens cernebatur. Paries nasi eo ulcere a gena diremptus solum in parte inferiore parva alae nasi portione cum gena labioque superiore cohaerebat. Crustis, quibus ex parte occludebatur, remotis, in cavum nasi prospectus patet, in quo funiculum massis sordidis ac subviridibus obtectum, qui septi maximam partem destructi reliquias offerens a parte superiore deorsum tendebat, cognoscere licuit. Regio ulcus cingens utrumque tumefacta colore cuprino tincta erat, qui color totum per nasum usque ad partes osseas pertinebat. Ex anamnesi compertum est, aegrotam quinque per annos syphilide affectam ejusque mali cura tractatam fuisse. Inde quam per aliquot annos valetudine nulla re turbata usa fuisset, mense Novembri anni 1848 ulcerationis processum, qui unde ortus esset sibi incognitum fuisset, pauloque post tumorem sub naso et a latere nasi situm, quo visus impediretur, a se animadversum esse narravit. Quem tumorem, quam pus emittere coepisset, ad partem externam apertum ulcus nasi, quod supra descripsimus, effecisse contendit. Malum, quod syphilidem constitutionalem esse cognitum erat, judeoreto mercurii, dosibus paulatim adiunctis, curatum fuerat, decocto lignorum pro remedio adjuvante in usum vocato. Aegrota primam syphilide liberata anno 1849 mensis Martii die 15 talem in modum operatio est instituta. Marginum aperturae ferme linea ablata nec non de angulo vulneris sic formati superiore incisuris duabus parallelis, usque ad lobiformandi initia pertinentibus, cutis particula lineas 3 lata decisa, ope duarum incisionum, quae in dorso nasi eadem

altitudine coeptae oblique ad partem dextram tendentes usque in genam continuatae sunt, lobus ovatus, fere pollicem longus, dimidium pollicem latus, a parte subjecta sejunctus, atque in vulnus antea jam ad id praeparatum translatus suturis nodosis et circumvolutis ad partes vicinas affixus est. Vulneris in gena effecti margines parte inferiore suturis circumvolutis alter alteri conjuncti sunt, dum pars superior, cuius margines consu niquirerant, membrana tenuissima operata est, quo facto fomentationes frigidae applicatae fuerunt. Die insequenti palpebra oculi dextri inferiore oedemate correpta universa aegrotae valetudo satis commoda erat. Inde oedemate die mensis Martii 17 magis etiam evoluto, quum die post membrana illa tenuissima esset amota, totum lobum usque ad osseas nasi partes gangraena affectum esse apparuit. Vulnera genae dextrae per primam intentionem non consanente, supparatio exstitit. Tum, quo celerius partes gangraenosae detruerentur, fomentationibus tepidis ex infuso flor. chamomillae paratis, demum die Martii 21 partibus gangraenosis perfecte detrusis, vulneris margines fricando ope specilli sauciati suturisque instructi sunt. Nasus emplasti adhaesivi taeniolis, ejus apici suppositis, sursum attollebatur. Paucis diebus elapsis, quam vulneris in gena margines optime coaluiscent, suturae extracti potuere, vulnera genae dextrae per secundam intentionem sanato. In nasi dorso ex lobi gangraena correpti reliqui torus permagnus exortus est, quem necesse erat forficē desecari. Ab eo inde tempore quam sanatio in dies melius procederet, vulnera genae dextrae, postquam ope arg. nitric. contractatum est, cicatrice obducto, aegrota valetudine restituta nosocomio fuit demissa.

6. Defectus nasi dimidii post syphilidem. — Rhinoplastice dimidiata secundum Dieffenbach.

Alter quidam casus eodem anno est observatus, anna Russica, nomine Akulina Semenowna, annos 22 nata, ob nasi defectum in nosocomium chirurgicum recepta. Quam aegrotam si vel obiter adspiceres, facies nasi partim deficiente, partim collapso deformata conspiciebatur. Namque pars nasi sinistra inde ab apice usque ad partium ossearum marginem cum parte vomeris superiore, septoque cartilagineo narum tota defecit. Pars nasi dextra cicatricis contractionibus ad partem contrariam tracta ex parte substantiae jacturam texit. In parte dextra sulcus transversus cartilagine corrugata exortus, oblique a parte superiore ad inferiorem decurrens, in conspectum se dedit. Nasi apex sursum trahebatur partesque osseae adhuc aderant. In aperturam substantiae jactura factam si spectares, destructionis processus adhuc perdurare animadvertebatur. Concha sinistra omnino deerat, dextra adspectui patente. Orc aperte lamina argentea, magnum foramen in palato duro nec tamen totum obtegens, fissura a palato in linea media ad partem posticam porrecta, in conspectum venit. Palatum molle maxima ex parte destructum, et cicatricis contractionibus deformatum erat, praeterea omnibus colli locis exulcerationibus inventis. Aegrota, postquam in nosocomium fuit recepta ut syphilidis vestigia, si qua adessent, perfecte tollerentur, iterum cura antisyphilitica tractari coepit. Quo malo sublato, Kalendis Decembribus prof. *Adelmann* defectus marginibus denuo sauciatis partibusque nasi collapsis rursus elevatis operationem rhinoplasticam secundum methodum

Dieffenbachianam instituit. Concretio facierum internarum ut prohiberetur, in nares recens formatas duo pennarum caules, linctis carpis oleo humectatis circumvoluti, invicti sunt. Vulnus in fronte factum linteo fenestrato oleo humectato obtectum emplastri adhaesivi taeniolis in positione sua tenebatur. Quo modo dextrum nasi dimidium prius collapsum a partibus suppositis separatum lobo recens transplantato inniti potuit, dorsumque nasi et formam et situm normalem recuperavit. Brevi post operationem tempore et horror ingrui et lobus caeruleus exstitit, qua de causa, dum temperatura lobi translati minueretur, fomentationes frigidae partibus illis applicitae per biduum continuabantur. Acerrimi frontis dolores, qui operationem secuti erant, brevi cessarunt, et valetudo aegrotae praecepsimque partium, quarum operatio facta erat, habitus tum fausta crant, ut tertio post operationem die fomentationum frigidarum usus intermitti posset. Et hoc die et sequentibus nonnullae suturae amotae sunt, dieque septimo ultimae solutae. Lobo per primam intentionem sanato, suppuration modica, quae in apice exstiterat, aliquot diebus post sponte desit. Locis frontis denudatis quam copiosae apparuerint granulationes, hae, quo celerius sanatio fieret, lapide infernali attractatae sunt, dieque 25 ponte dissecto pars cutis fronti adhaerens sursum reflexa est. Nasus, qui ab initio tam bene se haberat, cicatricis contractionibus paululum depresso est, quae depressione operatione secundaria facile in perpetuum corrigi poterat. Verumtamen aegrota, ut iterum operationem sustineret, nullo modo permota est. Membranae musosae pharyngis relaxatio atque exulceratio, aeris externi aditu intercluso, totae evanuerant. Ceterum admoneamus oportet,

quum lobus ex justo altiore frontis parte petitus esset, pilos in nasi apice procreuisse, ad quos expellendos aegrotae pasta depilatoria *Berselianæ* ad infriacandum data est. — At hoc remedium, quamvis diutius adhibitum, nihil profuit.

7. Lupi sequelæ. — Rhinoplastice *Dieffenbachiana*.

Lena Ackas, puella Esthonica, annorum 11, corporis constitutione debili, facie pallida habituque scrophuloso, anno 1850 die mensis Martii 16 in nosocomium chirurgicum fuit recepta. Cujus facies tumida asperaque et nasi pars anterior deficiens vel primo aspectu apparuerat. Exploratione diligentiore facta, partes laterales nasi cartilagineas, exceptis alae dextrae particula parva, septoque nasi, perfecte destructas esse cognitum est. Margines reliquiarum nasi jam cicatrice obducti ambaeque genae maculis ex caeruleo rubicundis nodalisque spongiosis, colore ex caeruleo rubro tinctis, nihil doloris scientibus, obtectae erant, qui noduli, passim conferti et emolliti, postea, processu cicatrisationis coepito, cicatrices codem colore imbutas squamis albidis parvisque obsitas reliquere. Gena accuratius indagata et crassam se praebuit et perscrutanti talem obtulit indolem, quasi tota, praesertim parte interna, ejusmodi nodulis infiltrata esset. Oris quoque membrana mucosa hujus processus morbosici partice, imprimis angulus oris dexter cum membrana mucosa ipsum intus vestiente affectus cernebatur. Partes ejus destructae crusta fusca densaque obtectae erant, universa aegrotantis valetudine ceteroquin haud incommoda. Ex anamnesi compertum est aegrotam jam ante

oleo jecoris aselli multisque aliis medicaminibus, quae tamen nihil auxilii afferrent, tractatam fuisse. — Aegra, iterum cura instituta, jam convaluit. Post evacuationem alvi, ope calomelanos et jalappae effectam, aegrota alternis diebus 3*viii* decocti Zittmani fortioris, totidemque unicas mitioris sumebat, usu externo hydrargyri iodati flavi in aqua solutione ad fomenta adhibita. Cutis actio ut excitaretur, aegrota et balneis utebatur, et saepius ambulare jussa est. Supererat, ut nasi defectus operatione repararetur, quem in finem dic mensis Aprilis 19 methodus indicia, a *Dieffenbach* emendata, in usum convertitur. Lobus triangulus, c' cute frontali confessus, suturis circumvolutis affixus est, septo narium in incisionem ad labium superius factum immisso. Naribus tubuli Belliani sunt applicati. Lobus, excepto loco, cui septum affixum erat, quo loco iterum suturam applicari necessarium erat, per primam intentionem consanuit. Dyscrasia quum tota extingui nequiret, die mensis Maji 11 olei jecoris aselli usum repeti placuit, die mensis ejusdem 21 oculi sinistri conjunctivitide, quae tamen brevi sublata est, accidente. Die Maji 30 aegrota, et naso instructa et valetudine universa multo meliore redditâ, nosocomio excessit.

Caput IV.

De operationibus oris (Chiloplastice).

De operationibus chiloplasticis ad annum 1850 in nosocomio nostro susceptis, quum in dissertatione *Messerschmidtiana* jam supra commemorata descriptae sint, lectorem benevolum ad hujus commentationis pag. 24—54 relegatum

volumus. Mihi nunc quasdam operationes post opusculum *Messerschmidianum* in medium prolatum institutas publici juris facere liceat, qua in re, iis, quae in praefatione dixi, innexus, omnibus, quae hic non pertineant, praetermissis, eas tantummodo operationes, quae secundum chirurgiae plasticae principia factae sint, proponam.

8. Cancer epithelialis labii inferioris. — Chiloplastice *Dieffenbachiana*.

Anni 1850 mense Septembri: Esthona Kersna Pollacken, annorum 36, labii inferioris ulcere canceroso laborans, auxiliū artis petitura, in nosocomium chirurgicum venit. Mulier statura corporis media, constitutione satis robusta, haud obscura dyscrasiam cancerosae jam evolutae vestigia ostendit. Digestio turbata, cutis sordida, subflava, colli glandulae valde tumefactae malum non tantum locale esse plane demonstrarunt. In labio inferiore, proprius sinistrum oris angulum arcus ad instar substantiae jactura tollis emollitis destruetisque provocata apparuit, vulnero telarum destructarum reliquis sordidis impletō, sanieque limpidam, male olentem excernente. Regio ulcus circumdans colore rubro imbuta erat, quae infiltratio usque ad maxillam inferiorem pertinuit. Os concludere aegrotae non licebat, saliva sine intermissione profluente, quo accessit ut mulier doloribus intolerandis lancinantibus ac pungentibus in ulcere modo descripto perceptis cruciaretur, quibus, ut artis auxilium imploraret, fuit impulsa. Teste aegrota, jam pluribus ante annis glandularum intumescentia orta erat, quam tamen, quam non impediretur, quin munera domestica obiret, nihil fecerat. Deni-

que quadriennio ante ad lobium inferius nodulus duriusculus, nullos dolores excitans, apparuerat, qui, sensim magnitudine auctus, ad nucis ambitum accessit. Duobus ante mensibus dolores lancinantes, admodum molesti, in nodule exstiterunt, superficie ejus in ulcus supra descriptum permutata inde a circumferentia mollescente atque detrusa et saniem foetidam excernente. Qua in re, circuitu magis magisque infiltrato, dolores increverunt. Operatio, quamvis parum levaminis allatura videretur malumque infastissimac esset prognoseos, tamen aegrotae negari non poterat, qua de causa, die mensis Septembri 18. extirpatione suscepta, substantia perdita lobo e gena petitio secundum methodum *Dieffenbachianam* fuit resarta. Fascia emplasti adhaesivi taeniolis affixa, fomentationes aquac *Goulardi* praescriptae sunt. Vulneris sanatione per primam intentionem facta, die post operationem duodecimo i. e. Septembri die 23. aegrota, valetudine restituta, e nosocomio demissa est. Glandularum intumescentiam quum resolvere non contingeret, aegra, ut, simulatque alicubi dolores perciperet, extemplo nosocomium adiret, fuit admonita. Hucusque tamen nihil amplius de ea comperimus est.

9. Cancer labii inferioris. — Chiloplastice *Jaeschiana*.

Adamus Kanne annos 54 natus, corporis constitutione robusta, anno 1851 die mensis Aprilis 19. ob tumorē, eadem, qua faba est, magnitudine praeditum durumque et dolores excitantem, qui tumor labium inferius obtinebat, in nosocomium fuit receptus. Tumor, cum regionibus circumiectis arctissime cohaerens, in medio cute denudatus, faciem

praebuit exulceratam, fundum sordidum, margines duros callososque, locis circumjectis colore ex caeruleo rubro imbutis. Secretum e liquore sanguineo seroso, nullo proprio odore insigni, constitut. Sub lobii membrana mucosa infiltratioes filamentosae esse persentiebantur, quae quidem usque ad sinistrum oris angulum deorsumque ad spinam mentalem pertinuerunt. Superficiem exulceratam crusta sordida, subflava obtexit, et glandula submaxillaris sinistra paululum intumuerat, ceteris glandulis tum salivalibus tum lymphaticis a norma non discedentibus. Glandulae axillares utrimque non acreverant, inguinales contra paululum tumidae cernebantur, ceteris functionibus quam vegetativis tum animalibus non turbatis. Aegrotus triennio ante excoriationem sine ulla causa exortam in labii superficie a se animadversam narravit, quae exocoriatio subinde paululum latius serpsit. Anno ante equi ungula loco affecto percussus, jam ab illo tempore, doloribus periodicis subinde recurrentibus, cum vidit exoriri statum, quem, quem in nosocomium venit, prae se ferbat. Paucis diebus ante quam similes dolores labii superioris ingruissent, aegrotus, ut operationem fieri permitteret, adductus est. Qua die mensis Aprilis 25. secundum methodum *Jaeschianam* facta fascia solita applicata, quam inflammatio oriretur, fomentationes frigidae in usum vocatae sunt. Sanatione per primam intentionem celerrime facta triduo post operationem omnes suturae, illa quae angulo oris injecta erat excepta, solvi poterant. Omnia vulnera per primam intentionem consanuerunt, excepto loco exiguo, ad membranam mucosam prope oris angulum externum sito, qui tamen saepissime lapide infernali contrectatus quam brevi sanatus esset, aegrotus, duabus post

operationem hebdomadibus elapsis, novo labio inferiori, quod adeo paululum moveri poterat, instructus nosocomio excessit.

10. Cancer labii inferioris. — Chiloplastice *Jaeschiana*.

Naribon Nikiforow, Russus Plescoviensis, annorum 50, statura corporis media, robustus, specie, quamvis non florida, tamen non cachectica, anni 1830 die mensis Junii 27. in nosocomium chirurgicum fuit acceptus. In labio inferiore tumor carcinomatous infiltratus atque exulceratus, in quo subinde dolores lancinantes percipiebantur, situm habuit. Aegrotus, qui antea nulla contendit dyscrasia se laborasse, ac praeterquam quod duae glandulae lymphaticae sub maxilla inferiore positae cum glandula submaxillari dextra non ita magnopere intumuerant, quas loco etiam movere licebat, nullas alias glandularum intumescentias offerebat, in universum valetudine erat satis commoda. Anno et dimidio ante tumorem specie noduli in dextra labii inferioris parte exortum esse retulit, nulla tamen, qua provocatus esset, causa sibi cognita. Anno ante tumor dolores movere cooperat, qui tamen irregulares erant, nec ita acres fuisse videntur. Anno dimidio post superficies tumoris, tum eadem, qua nux juglans est, magnitudine praediti, emollita saniem foetidam satis crassam excernere coepit, quae ex parte in crustas fuscas exsiccata superficiem majore ex parte, nunquam tamen totam, obtegebat. Tumor, qui aliquot lineis altitudinem telarum circumiacentium granulationibus brassicae botrytidis similibus superabat, a commissura dextra initio capto, duos

pollices longus, unum latus, ad mentum orisque angulum sinistrum pertinuit. Infiltratio dura, filamentosa spatium aliquanto majus obtinuit. In ore facies exulcerata coloreu inducerat magis pallidum, ejus prominentiis dentibus anterioribus complanatis. Regionis tamen circumjectae infiltratione subito terminata cutis et membrana mucosa vicina omnino sanas se praebuerunt. Aegrotus, quod malum adhuc locale videretur et sperari posset, fore, ut morbus radicibus tolleretur, ut operationem subiret, fuit admonitus. Operatione a Dr. *Bock*, tum adjutore nosocomii chirurgici, nunc medico legationi Russicae, quac in Persia est, adjuncto optimo cum successu peracta, quum vulneris margines secundum methodum *Jacschianam* facta operatione conjuncti essent, aeger lectulo est impositus. Ut initio, quum reactio non magna fuisset, nullae fomentationes frigidae in usum revocatae sunt, ita, biduo post operationem exacto, labium recens formatum valde intumuit, ita ut suturae labium admodum costringerent. Quo tumore tamen paucis diebus minuto, die mensis Julii 2. margines vulneris ita inter se coauerant, ut suturas solvere liceret. Ceterum quum aegrotus incautius movendo commissuram dextram paululum distractisset, suppuratione monida exstitit, atque, commissura lapide infernali adhibito quum sanata non esset, marginibus vulneris forfice *Cooperiana* consauciatis, de integro sutura est applicita. Qui locus quamquam bene consanuit, tamen aliquot diebus post dextra faciei parte paulum tumefacta, inflammatio erysipelatosa exorta est, quae paucis diebus in alteram faciei partem capitisque cutem transiit. Partes, in quibus operatio facta erat, optime se habebant, cicatrice recenti satis consolidata. Partibus, quac erysipelate correptae erant, oleo camphorato

illitis, desquamatio brevi incepit et, sanitate mox restituta, aegrotus nosocomio excessit.

11. *Cancer labii inferioris. — Chiloplastice Dieffenbachiana.*

Nicolaus Iwanow, annos 48 natus, media corporis statura, specie cachectica, anno 1850 die Augusti mensis 30. in chirurgicam nosocomii partem acceptus in labio inferiore ulcus obtulit excrescentiis brassicae botrytidii similibus obsitum, marginibus reflexis circumdatum, a sinistro oris angulo initio capto, lineis 2 a dextro terminatum labiumque inferius praesertim membranam mucosam obtinens. Diametros maxima a parte suprema ad infimam est, ulcere parte inferiore forma elliptica praedito. Fundus marginesque reflexi saniem male olentem excernunt. Inter os hyoideum posticumque maxillae inferioris marginem tumor duriusculus, nucem avellanam magnitudine aquans, qui libere moveri poterat, cuti subesse persentiebatur. Cutis tumorem obtegens et colore et temperatura normali erat. Glandulae maxillares et sublinguales pariter ac ceterae hujus regionis glandulae minores ex parte induratae erant. In axilla nullae inventae sunt glandulae tumefactae, dum in regione inguinali induratae erant. Aegrotus dolores urentes, pungentesque in ulcere locisque circumjectis perceptos conquererebatur. Ulcus aque, ac plerique labii inferioris cancri in hisce regionibus solent, e nudulo, sponte exorto, paulatim accrescente et dolorifice exstiterat. Qui nudulus cura irritante adhibita mox emollietus, quo tempore etiam dolores ingruerunt, jam cancri aperti indolem induerat. Quamquam glandularum vicinarum indratio speciesque aegroti cachectica malum non solum locale

indicarunt, nec operatione sanationem perfectam allatum iri sperare licuit, tamen aegroto, si vitam sibi aliquamdiu servari doloribusque carere euperet, operationem ut sustineret, persuasum fuit. Qua die m. Septembri 8. secundum methodum *Dieffenbachianam* horae et quadrantis spatio facta, qua in re aegrotus chloroformylo sopitus erat, (qui chloroformyli usus, ut in transcurso moneamus, tum primum in operatione plastica oris fuit adhibitus) art. cor. lab. infer. torqueri et art. maxillar. exter. deligari opus erat. Sanatione per primam intentionem facta, quum et glandularum colli intumescientia aliquanto deminuta esset, qua re prognosis faustior statui poterat, aegrotus mensis Octobris die 2. nosocomium reliquit.

12. Cancer labii inferioris. — Chiloplastice *Dieffenbachiana*.

Anno sequenti rusticus Esthonus Mert Coint, annos 45 natus, cancro labii inferioris affectus in nosocomium venit. Carcipomatis jam emollii superficies ulcerus praebuit permagnum regionē non admodum infiltrata circumdatum, glandulis colli nondum tumefactis. Quamvis aegrotus specie esset satis cachectica, tamen, ut saltem malum locale tolleretur, operationem suscipi placuit. Qua die m. Martii 24 secundum methodum *Dieffenbachianam* sine chloroformyli usu peracta, quum vulnus per primam intentionem consuisset, rusticus die m. Aprilis 16 nosocomio est dimissus.

13. Cancer labii inferioris. — Chiloplastice *Dieffenbachiana*.

Michael Weiss, Esthonus annorum 50, anno 1852 m. Decembri ob labii inferioris ulcerus cancerosum in nosocomio

est receptus; qui quum satis robustus videretur et dyacrasiam nondum adesse suspicari liceret, die quinto secundum methodum *Dieffenbachianam* ipsius assensu operatione facta, postquam vulnus modo usitato occlusum et fascia applicita est, reactionem per quam exiguum obtulit. Die sequenti quum membrana mucosa lobum dextrum cingens colore intense caeruleo tincta esset, ne forte gangraena in ipsum lobum propagaretur, ejus basi duas applicatae sunt hirudines. Quo facto quum sanguinis profusio quam diutissime continuata esset, die m. Decembri 7 locus iste, quamvis laxus et discolor, tamen gangraena nondum affectus erat. Lobus ipse integer, temperatura normali, die sequenti, exsudatis cum regione circumjecta coalitus, tam bene se habuit, ut nonnullae suturæ amoveri possent. Membrana mucosa lobum dextrum cingens quum omnino gangraenosa exstisset, fomentationes aquae plumbicæ sunt praescriptæ. Quae tamen, quum reactio nondum augeretur neque partes gangraenosæ detrudi coepissent, cum aliis sunt permutatae ex aqua plumbicæ. ʒvj, spiritus camphor. ʒjʒ, tinctur. opii simplic. ʒj. Dic m. Decembri 10, partibus gangraenosis detrusis, locus iste granulationibus per quam laxis erat obtectus. Defectus arte in lateribus provocati tinctura Cantharidum obliti quum parum ad coalescendum proclives cernerentur, unguento digestivo obtecti sunt. Omnes incisuræ commisura dextra prope locum gangraenosum, ubi suppuratione exstitit, excepta per primam intentionem consuancerunt. Sutura soluta, quum loci illius cicatrisationem suppuratione factum iri speraretur, granulationes tamen pullulare non cooperunt, sed die m. Decembri 21 modica frigoris accessione praegressa erysipelas in si-

nistra faciei parte exstitit. Quamvis pulvilli speciebus aromaticis impleti ac remedium laxans adhiberentur, tamen erysipelas per dorsum nasi alteramque faciei partem serpsit. Triduo post ad maxillam inferiore ulcus parvum regione indurata circumdatus fundo sordido praeditum, ex quo excrescentiae brassicae botrytidi similes prominuerunt, in conspectum venit. Quo loco lapide infernali contrectato, quum excrescentia non cessaret, erysipelate finito, prof. **Adelmann** operationem instituere animatum induxit. A media labii inferioris parte secundum cicatricem recens formatam incisio usque ad maxillac inferioris marginem, indeque altera pollicem cum dimidio longa per maxillae inferioris marginem facta est. Lobus sic conformatus sursum sublatus partesque affectae duabus incisuris semilunatis limitatae ope caeli et mallei amotae sunt, qua in re duo dentes incisivi, qui vacillabant, evulsi sunt. Inde ferrum candens applicatum, tum loco, ubi commissura dextra efficienda erat, qui locus cicatrice obductus fuit, denuo sauciato, tres suturae nodoſae injectae sunt. Ceteris incisionibus ope suturarum circumvolutarum- occlusis, fomentationes frigidae institutae sunt. Excepta commissura recenti, ubi suppuratio exorta est, omnes incisurae per primam intentionem tanta celeritate sanatae sunt, ut aegrotus ineunte mense Februario e nosocomio dimitti posset.

14. Cancer epithelialis labii inferioris. — Chiloplastice *Jaeschiana*.

Idia Taniel, rusticus Esthonius, triginta amplius annos natus, labii inferioris ulcere laboravit. Quod ulcus quum ex nodulo, sine ulla causa orto, nihil doloris ciente, postea

emollito, exstisset, regione circumjecta indurata, excrescentiis sordidis brassicae botrytidi similibus obsitum, marginibus reflexis praeditum, sanie foetido ex fundo profluente, facile cognitum est carcinoma esse; quae quidem diagnosis postea investigatione ope microscopii facta est confirmata. Aegrotus nullam glandularum intumescentiam offerens commoda usus est valetudine, sola rapida ulceris evolutione mirationem movente. Etenim aegrotus, qui anno 1853 die m. Maji 10 in nosocomium receptus est, se primum anno superiore extremo nodulum supra commemoratum in labio inferiore animadvertisse retulit, dum ulcus, quo tempore artis auxilium imploravit, jam ad ovi columbini magnitudinem accreverat. Ea, quam diximus, aegroti conditione quum spes haud deesset, fore ut sanitas perfecte restitueretur, aegro, ut operationem subiret, persuasum est, quae operatio d. m. Maji 13 secundum methodum *Jaeschianam* a Dr. *Kiehnast* est instituta. Sanatione per primam intentionem facta, tamen aliquot diebus elapsis, genac sinistrae erysipelas exstitit, quod nonnullorum dierum spatio paulo longius progressum, nulla ad vulnus operatione factum vi noxia exhibita, curae accommodatae cessit, ut aegrotus mense Junio medio, sanitate recepta, e nosocomio dimitti posset. At anni sequentis mense Februario aegrotus in nosocomium rediit, glandulae submaxillaris tumore permagno laborans, qui ex cancro recidivo exstiterat.

15. Cancer labii superioris. — Chiloplastice *Brunsiana*.

Casus chiloplastices ultimus, qui superest ut enarretur, ad feminam 70 annorum nomine Tio Juergenson, cancro

epitheliali labii superioris affectam, pertinet. Quae molier, quamvis exacta aetate, tamen adhuc robusta speciem optimae valetudinis praebuit, ciborum appetitu non deficiente omnibusque functionibus normam sequentibus. Die m. Octobris 9. chiloplastice secundum methodum *Brunianam* facta, quum fomentationes frigidae essent applicatae, die sequenti inferior lobi sinistri recons formati triens gangraena coripi coepit, quae gangraena die post adeo acreverat, ut pars affecta servari non posset. Ceteris incisuris per primam intentionem occlusis, suturas removere licuit. Locis affectis collodio illitis, partes gangraenosae ope forficiis ablatae sunt, quo facto, quum granulationes pullulare coepissent, usque dum perfecta succederet cicatrizatione, lapide infernali contrectabantur. Cura secundaria dum durat, diarrhoea non ita vehemens alvi doloribus conjuncta ingruit, quae postquam tintura opii simplici tinturaque nucis vomicae sublata est, d. m. Novembris 10. aegrota nosocomium reliquit.

Caput V.

De operationibus plasticis genae (Melioplastice).

16. Ulcus malignum prope oculi angulum exterum ulcerus. — Meloplastice *Dieffenbachiana*.

Trino Cunik, rustica Esthona, annos 30 nata, constitutione corporis debili praedita, quae saepius se aegrotasse, nunquam tamen morbo graviori implicitam fuisse narravit, examine habito quantum compertum est, nulla ante dyscrasia, ex qua malum, quo affecta erat, ortum crederetur, labora-

verat. Aegrotae vires, aetatis ratione habita, satis integræ erant, sed e facie vultuque dolores, quos jam longius per tempus toleraverat, facile apparabant. Ad oculi sinistri angulum externum ulcus ambitu in omnes regiones fere polluem aequans, marginibus duris, inaequalibus, reflexis praeditum granulationes malignissimas, potius excrescentis tuberosis ac discoloribus similes, praebuit. Media ulceris pars admodum profunda pure impleta erat, quod, dum in medio paululum cernitur crassius, fluido magna ex parte non spiso sordidoque et flavo constabat. Destructio cancerosa usque ad periosteum, quod tamen non affectum videbatur, pertinuit, angulo oculi externo perfecte, palpebris ex parte destructis. Conjunctiva bulbi autem nec non bulbus ipse mali nondum paticeps erat, oculi functione nondum impedita. Cutis circumjecta inflammatam, colore intense rubro tintam se praebet et contrectanti dura calidaque appareat, aegrota lancinantes in vulnere dolores querente. Ulcus quum malignissimum esse pateret et aegrota, quam fieri posset celerissime, se sanari cuperet, extirpationem suscipi locumque exulceratum lobo integro obtagi visum est optimum. Partibus affectis specie trianguli ope incisionum limitatis, quarum incisionum altera a margine orbitali, superiore exiens deorsum per palpebram utramque, ita ut externus triens a reliquis partibus disjungatur, usque ad genam facta est, altera horizontalis a supremo illius puncto tempora versus instituta, tercia inde a fine posterioris facta cum prima incisione in gena decussatur, ulcus huic triangulo inclusum una cum fundo ac periosteо degenerato fuit extirpatum. Quo facto ex relieta genac cute lobus conformatus est, qui ut fieret, incisura verticali usque infra oris angulum pro-

ducta, ab ejus fine altera incisio parallela cum externo trianguli crure direccione eademque, qua illud crus erat, longitudine est instituta. Lobus, sic formatus, cum cura a partibus subjectis sejunctus, quum rursum translatus esset, ibi suturis circumvolutis quatuor et duabus nodosis cum superiori vulneris margine palpebrisque fuit conjunctus. Tertio lobi latere suturis carente, totus lobus emplastri adhaesivi taeniolis afflatus est, frigidaeque fomentationes praescryptae. Sanatione per primam intentionem facta, quum, d. m. Martii 20 i. e. tortio post operationem, suturae amotae essent, tamen ad marginem vulneris superiorem modica suppuratio exstitit lobusque adeo depresso erat, ut novam suturam nodosam applicari placeret. Ab eo inde tempore sanatio optime processit. In ulcere extirpando externum palpebrae trientem ablatum, loboque recens formato reparatum esse jam supra admonuimus. Qua re videndi facultas eatenus turbata est, quod et corneae pars obtecta erat, et prospectus oculo ad partem externam converso minus patuit. Cui incommodo ut occurreretur, blepharophimosis arte provocata, incisione ab interno lobi margine usque ad marginem orbitae instituta, sublata est. Igitur, postquam vulnus cicatrice obductum est, aegrota palpebris ex parte reparatis, quas fere aequae ac naturales movere licebat, ulcereque sanato die m. Aprilis 26 e nosocomio dimissa est. Anno tamen 1848 aegrota in nosocomium rediit, cancrum recidivum in angulo oculi externo lobumque destructum offerens.

Cancer genae. — Meloplastice.

Denique ultimo casu, quem descripturi sumus, Esthonus Isak Sirel annorum 38, statura corporis media, constitutione

robusta, specie florente, ciborum appetitu optimo, denique valetudine universa satis commoda, anno 1833 d. m. Augusti 3. in nosocomium chirurgicum receptus tumore immobili in gena dextra 2^o longo, ab inferiore margine processus Zygomatici ossis maxillaris usque ad marginem alveolarem maxillae inferioris pertinente, 4½^o lato, laborabat. Genae exploratione interna instituta, tumor illi, quem a parte externa persentire licebat, respondens inventus est, cuius limites tamen aliquanto certius, quam extrinsecus, percipi poterant. In interna genae facie ulcus pollicis dimidi inerat, unde funiculi duri, filamentosi in regiones vicinas abibant. Quod ulcus colore sordido, subflavo tinctum fluidum saniosum foetidumque excernebat. Praeterea vel primo adspexit glandulae partis dextrae submaxillares valde tumefactae conspicuntur, quarum exploratione accuratiore facta etiam glandula sublingualis lateris dextri et submaxillaris sinistra intumuisse cernuntur. Aegrotus quatuor ante mensibus in membrana mucosa genae dextrae visiculam exstisset narravit, quo brevi tempore dirupto ulcus efformatum majus magisque evasisse, praesertim tempore ultimo summa cum celeritate adactum. Ad hoc paulo ante capititis doloribus vehementissimis, pungentibus, in latere dextro perceptis, se laborasse ait. Quae quum ita essent, degenerationem cancrosam exstare manifestum erat, quae ut primo quoque tempore tolleretur quum plurimum interesset, d. m. Augusti 10., aegrota chloroformylo sopito, operatio est suscepta. Tumore duabus incisionibus ellipticis, quae ab arcu zygomatico profectae infra maxillae inferioris marginem inter se conjugebantur, terminato omnes partes affectae sunt ablatae. Qua in re arteriam maxillarem externam torqueri

glandulamque submaxillarem tumefactam extirpari necessarium erat. Deinde altera incisura, quae a prioris fine secundum maxillae inferioris marginem decurreret, usque pone angulum maxillae inferioris instituta est, unde tertia incisio aurem versus adscendit. Lobus sejunctus et in defectum translatus suturis circumvolutis ibi affixus est, qua in re tensio quaedam, quum lobus minor exstisset quam qui ad vulneris margines pertineret, evitari non potuit. Ad masseterem spatium exiguum triangulare cute nudatum remanserat, quo linteis fenestratis obtecto fomentationes frigidiae institutae sunt. Lobus, quamvis hirudinibus bis applicitis, tamen gangraena corruptus est, quo loco quam iterum, antequam sanatio fieret, cancer exstisset, qui latius latiusque serpens ad laryngem propagatus est, aegrotus vires exhaustas sentiens res domesticas sibi ordinandas causatus, ut domum redire licet, etiam atque etiam petuit. Qua venia impetrata d. m. Octobris 26. e nosocomio dimisus, aliquot hebdomadibus elapsis, quum cancer laryngem affectisset, suffocatione extinctus est.

Ex operationibus tum a Dr. *Messerschmidt* tum a me allatis, quarum 23 in maribus, 29 in feminis susceptae sunt, morbis, ob quos fierent, longe frequentissimis blepharophimosis et cancro, has sere conclusiones mihi videor deducere posse.

1) *Canthoplastice* saepius in feminis, quam in viris, est facta, ex toto harum operationum 18 numero 13 in feminis, quinque in maribus institutis. Practerea haec operatio secundissimos omnium eventus praebuit, si quidem unus tantummodo casus, in quo concretio sit facta, nobis

est cognitus. Ratio parum aequalis, quae feminarum, in quibus operatio instituta sit, numero cum viris intercedit, digna est, quam paucis attingamus. Usque ad hunc diem nullae existant observationes certae, ex quibus eruiri possit, in utro sexu blepharophimosis crebrius inveniatur. Evidem tamen, quum oculi formatio Esthonis⁵⁾ peculiaris quandam prae dispositionem afferat, malum fortasse utrius sexui acque frequens esse crediderim. Quum autem feminae in universum saepius, quam viri, oculorum affectionibus, praesertim trichiasi et distichiasi, laborent, atque in omnibus canthoplastice tamquam illarum operationum praeparatio facta sit, major feminarum ea in re numerus hac ratione optime explicari potuerit. Unde vero eveniat, ut feminae saepius, quam viri, ex oculis laborent, praesertim utrum tota earum vivendi ratio, an negotia, quibus cogantur, ut saepius, quam viri, in casis fumosis versentur, in causa sint, haec quaestio, quamdiu Esthonorum vita momentaque proclivitatem ad oculorum affectiones in his provinciis provocantia nondum satis illustrata sunt, nequit quam eo, quo optaveris, modo explicari potest.

2) Ad Rhinoplastice quod attinet, maxime ejus casus, quem quartum pg. 18 descripsimus, ad rhinoplastice totalem cute ex fronte petita, admoneamus oportet. Cutis dorsum nasi tegens quum hoc in casu integra esset, eam intactam relinquimus placuit, qua re non lobi recens formati ad locum vulneratum transplantandi causa aut ablata aut diffissa, — sed lobus super hanc cutem intactam ductus

5) Prof. Dr. *Hueck* de craniis Esthonorum, Dorpat 1830. Prof. Dr. *Adelmann*, Beiträge zur medicinischen und chirurgischen Heilkunde. Erlangen 1845. Vol. 2, pag. 80—88.

et ex parte ejus prominente nasi apex formatus est. Quae operatio tamen, quum, praeterquam quod lobus, nutritione propter sanguinis circulationem sublatam impedita, facile gangraena afficitur, lobus magnum per spatium a partibus nutrientibus separatus corrugetur necesse sit apexque nasi recens formatus sursum trahatur, ut tali ratione nunquam nasi sat longi conformari queant, ut mea quidem fert opinio, per quam manca atque imperfecta habenda est. Jam *Dieffenbach* auctor exstitit, ut cutis in nasi dorso diffissa a partibus subjectis sejungeretur atque in vulnus, ut coalesceret, imponeretur. Quo facto, simul atque in apice conjunctio exstitit, partem consanatam, excepto nasi apice recens formato, totam extirpari cutisque marginibus ope suturarum ad dorsum nasi affixis sursum reflecti jubet. Quae operatio, quamvis et difficilior sit, et multum temporis expostulet, tamen ratione illo in casu exhibitae tantopere praeestat, ut digna sit, quam semper, quum talis transplantatio necessaria videtur, sequamur. Lobus enim non modo minori gangraenae periculo expositus est, verum etiam, quum statim per totam longitudinem cum relictis nasi partibus coalescat, impeditur, quominus tantopere corrugetur, nec apex sursum tractus in nasi dorso torum efficere potest, quo nasi forma nequaquam corrigatur.

Deinde casus 6 injicienda est mentio, in quo collapsa nasi pars erecta dimidiumque deficiens e cute frontis conformatum est, nase tamen postea rursus collabente. Quia in re id falso institutum esse judico, quod nasi pars integra non, auctore *Blastius* ⁶⁾, desecta fuit. Etenim, licet *Dieffen-*

6) *Blastius*: Beiträge zur plastischen Chirurgie. Berlin 1848. Pag. 145—147.

bach partes relictas, quantum fieri possit, intactas manere jubeat, tamen intelligi non potest, quo modo cutis tam tenuis, qualis in fronte est, nase collabenti obsistere queat.

Nam lobus solum ad alteram partem corrugatus, ut nasus denuo collabatur, officiat. Itaque tanto plus mirationis movet, quod *Dieffenbach*, qui partes nasi quam plurimas integras relinquunt suadet, tam secundos rhinoplastices eventus nactus est, nec unquam, ut partes relictas amoveret, adductum se vidit. —

3) Jam *Messerschmidt* in commentatione saepius memorata virorum cancro laborantium numerum cum feminis comparatum hisce in provinciis longe alium inventum esse atque in observationibus a cl. *Tanchou*⁷⁾ Parisii factis admonuit, feminas tamen in his regionibus rarissim, quam mares, in observationem venire adjiciens, partium internarum cancro in aliis nosocomiis partibus curato. Medicis Parisini sententia licet vera sit, tamen equidem, saltem quod ad labiorum canceros spectat, ei subscribere noluerim, plurimorum annorum in nosocomio observationibus aliter serem habere docentibus. Lectores benevolos ad locum dissertationis *Messerschmidiana*, quo hominum cancro aegrotantium aetas sexusque afferuntur, relegatos volumus. Quas relationes hisce tabulis supplere licet.

Aetas.	Vir. .	Feminae.	Summa.
30	2	1	3
40-	1	—	1
50	5	4	9
70	—	4	4
Summa . . .	8	3	14

7) Gazette des hopitaux 1843. N° 79. pag. 343.

Quo si casus 69 a *Messerschmidt* prolatos addideris, viorum numerum fere duplo majorcm esse quam feminarum appetat, feminis hoc malo affectis pro rata parte aetatem provectionem attingentibus. Aetas, qua carcinoma in feminis primum in nostro nosocomio observatum est, pro rata parte longe posterior est, quam in maribus. Namque dum ex tabula *Messerschmidiana*, aetatem feminae primam annorum 28 esse videmus, puerum jam secundo vitae anno fungo medullari laborasse et usque ad annorum 27 aetatem viros 6 hoc malo aegrotasse cognoscimus. *Leroy d'Etiolles*⁷⁾ observationum seriem publici juris fecit, ex quibus operationem in hominibus cancro affectis instituendam non esse colligit, eos aegrotos, in quibus nulla facta sit operatio, pro rata parte aetatem provectionem, quam quibus operatio adhibita sit, adipisci ratur. Quas observations, quamvis diligenter institutas esse haud negaverim, tamen non in omnibus regionibus pro norma baberi posse putaverim, — quam difficultatum, quae in ejusmodi investigationibus offenduntur, et aegrotorum relationum de primis mali initiis saepe admodum mancarum ratione habita tales observationes non posse ab omni parte perfectas esse eluceat. Quod si statuanus, cancerum non modo ex dyscrasia⁸⁾ sed etiam ex irritatione locali enasci posse, ac demum paulatim evolutum dyscrasiam gignere, qua in re tamen haudquaquam secundariam cancri originem negaverim, non omnis spes desit, cancerum radicibus tolli posse, dummodo eum mature ex organismo auferre conemur. Sic *Guerrit Jan van*

*Wy*⁹⁾ casum quandam, quo carcinoma operatione funditus sublatum sit, memoriae prodidit. Ceterum licet constare ponamus, cancerum nullo modo radicibus sanari posse, tamen operatio, ut quae palliativa sit doloresque leniat et interdum ad aegroti vitam producendam valeat, magni momenti esse credatur. Vir doctus, quem diximus, numeris simpliciter comparatis operationis incommoda demonstravit, non omnes carcinomatum species pari celeritate evolvi aegrotosque, quibus affectio parum molestiae officiat, raro ad operationem confugere; sed demum tali stadio, quo operatio vel nihil vel parum auxiliū afferat, vel malum celarius progressum multos dolores excitet, artis opem implorare haud respiciens. Quibus aegrotis, si operationem negaremus, vix crediderim vitam produci, quum operatio, etsi sanitatem non restituerit, tamen vitam tolerabiliorem reddat. Inde, si quidem concedamus, malum locale cachexiae vim augere posse, intelligi nequit, quo modo, una ex causis quibus sanguinis dissolutio adjuvetur sublata, mors celarius inferri possit. Quia in re fuerit fortasse, qui objiciat, malo ex sede minoris momenti amoto, actiones vegetativas alio converti et deposita cancerosa aliis locis gravioribus eo facilius existere posse. Verumfamen, priusquam hoc concedatur, cancerum ibi ante non adfuisse, demonstrandum est; quae res antequam explorata sit, operatio cancri, quippe quae, si non radicalis, palliativa certe cura sit, unica est ratio, qua malum impugnemus. *Messerschmidt* suis observationibus nixus sententiam a *Leroy d'Etiolles* de cancris recidivis prolatam, etsi

7) *Gazette des hopitaux* 1843. No. 10. pag. 153.

8) *Handbuch der allgemeinen pathologischen Anatomie von Carl Rokitansky*. Wien 1846 Vol. I. pag. 163.

9) *Vermischte chirurgische Schriften von Guerrit Jan van Wy.* — Aus dem Holländischen übersetzt. — Nürnberg.

non omnino adspennatur, tamen, ut multis in rebus mutaret, fuit adductus. At is tamen plures cancros recidivos, quos equidem descripsi, cognitos non habuit. Observationum a me propositarum eventus longe infaustior cernitur, quum inter aegrotos 41, in quibus operatio facta erat, jam quatuor (No. 7, 14. 16. 17.) cancros recidivos obtulerint, dum ex operationibus *Messerschmidt* narratis post unam tantum anno 1849 secundum mixtam rationem cl. *Chopart* et *Dieffenbach* peractam cancer recidit. Nec dubito, quin plures cancros recidivos habituri fuerimus, si modo de omnibus aegrotis certiora cognoscere licet. Quae investigationes tamen quum difficultatibus implicitae sint paene insuperabilibus, vix exspectare possumus, via statistica nos unquam summas certas esse nacturos.

Gangraena tantummodo quatuor aegrotos, quorum morbos sub No. 5. 13. 15. 17. exposuimus, affecit, plerumque lobo vel tenso atque distorto vel incarcerated exorta. Itaque in chiloplastice praecepue, methodo *Dieffenbachiana* et *Brunsiana* exhibitis, quibus major substantiae jactura facta est, partesque magis extendi necesse fuit, gangraena ingruit. Contra operatione *Jaeschiana* in usum vocata, quum minor substantiae jactura fieret neque tensio tanta esset, partes ad labium formandum exhibitat rarius gangraenae periculum subierunt. Qua operatione si quis, substantiae jactura majore, uti voluerit, incisionibus altera justo propius alteram sitis, pons conjungens nimis angustus ad lobos nutriendos non sufficiat. Fortasse lectori *erysipelatis* tempore proximo frequentia mirabilis videatur, quod malum fere post omnes operationes extitisse narravimus. Itaque moneamus oportet, *erysipelata* ex anno 1853 ineunte non solum in nosocomio,

comio, verum etiam tota urbe epidemice saevisse, nec modo post operationem vel levissimam orta esse, sed permultos quoque *erysipelatis* idiopathicus casus, in quibus saepe affectio, priusquam processus morbos finiretur, per totum corpus decurrit, observatos esse (*Erysipelas ambulans*). Singulos operationis casus si contempriere, fortasse eo adducaris, ut feminas in malis, quibus ipsarum cupiditas placendi violetur, et facilis operationem sustinere animum inducere et ipsam operationem majore patientia, quam viros, perferre concludas, quum contra in carcinomatice aliquis malis lethabilibus, quibus istud placendi studium minus afficiatur, dolores vel acerrimos tolerare malint. Fere in omnibus de chirurgia plastica relationibus seminarum numerum, si quidem operatio id ageret ut forma externa emendaretur, virorum numero aliquanto praestare invenimus. Viros enim, ut operationem subirent, non commovit, nisi destructio partium, organorum functiones turbans. *Dieffenbach*¹⁰⁾ unum tantummodo meminisse videtur casum, quo vir, naso destructo, rationibus vitae socialis impulsus, operationem nasi reparandi causa subierit, nec nisi inter homines ordinum superiorum, ubi utriusque sexus rationes inter se similiores cernuntur, complura ejusmodi exempla reperire contigerit. Contra ex Esthonis nostris vix quisquam pulchritudinis studio operationem sustineat; et in urbe quoque, quamvis in nosocomio in feminis tantum operationes factas esse viderimus, tamen mihi videor non minorem virorum naso parentium numerum conspexisse, quam seminarum. Hanc regulam,

10) Chirurgische Erfahrungen. Vol. 3 præfat. Berlin 1834.

quamquam ubique ratam non contendorim, tamen, si vera cognoscatur, momentum gravissimum ad utriusque sexus psychologiam, quae medico non potest, quin gravissima sit, praebitaram esse arbitror.

Theses.

- a) *Metastases scabiei statuendae non sunt.*
 - b) *Pulsus acceleratus per se venaesectionem fieri non jubet.*
 - c) *Rhinoplastice, lobo ex cute humeri exciso, rationi, qua lobus ex cute frontis petitur, praferenda est.*
 - d) *Hymenis praesentia crimen stupri consummati non refellit, si quidem alia documenta non defuerint.*
 - e) *Strepitus cordis systolicus vitii organici cordis documentum non est.*
 - f) *Nullum existat certum gravitatis signum, nisi cordis foetalis palpitatio partesque, quae persentiri possint.*
 - g) *Syphilitis in primariam, secundariam, tertiarium divisio rejicienda est.*
-